

NAQQIUT

FM 2017/137-imut imaani avatangiisinut illersuineq pillugu Inatsisartut inatsisaannut nr. xx, xx 2017-meersumut siunnersuummut, saqqummiussissummik 15. Marts 2017-meersunik taarsiivoq

(Kalaallit Nunaata eqqaani imaani mingutsitsinermut akiuiniarneq pillugu Illersornissamut Ministerip aamma Namminiilivinnermut, Pinngortitamut, Avatangiisinut Nunalerinermullu Naalakkersuisup akornanni, 24. Marts 2017-imeersumik najoqqutassiatut isumaqatigiissuteqartoqarnera naapertorlugu inatsisissatut siunnersuutit oqaluuserinissaanut saqqummiussissummumut iluarsiiisutit, naqqiut atorlugu suliarineqarput. Kalaallit Nunaata eqqaani imaani annertuumik mingutsitsisoqartillugu, Kalaallit Nunaanni Namminersorlutik Oqartussanit naalagaaffik mingutsitsinermik akiueqqullugu qinnuigineqarsinnaasoq, qinnuteqaammillu taamaattumik akuersissalluni mingutsitsinermullu akiuinnermut aningaasartuutit akilissallugit naalagaaffik pisussaaffeqartoq najoqqutassiatut isumaqatigiissummi aalajangiunneqarpoq. Allannguutit Inatsisissatut siunnersuutit nassuiaatitaannut ikkussuunneqarput.)

Uunga siunnersuut: Imaani avatangiisit illersorneqarnissaat pillugu Inatsisartut inatsisaat nr. xx, xx. xx 2017-imeersoq.

(Namminiilivinnermut, Pinngortitamut, Avatangiisinut Nunalerinermullu Naalakkersuisoq)

Saqqummiussissut

(Namminiilivinnermut, Pinngortitamut, Avatangiisinut Nunalerinermullu Naalakkersuisoq)

Siullermeerineq

Nunap imartaani imaani avatangiisinik illersuinnermut akisussaaffik 1. januar 1993-mi Kalaallit Nunaata akisussaaffigilerlugu tiguaa. Nunamiit pinngitsumik nunap imartaani mingutsitsinerit Inatsisissatut siunnersuummi maleruagassiuunneqarput, tassalu mingutsitsineq imaani, immap iluani immallu qulaani suliaqarnernit pisoq tassani pineqarpoq. Nunap imartaa tassaavoq sinerissamiit imaq tunngaviumillu killeqarfimmiit avammut 3 sòmilit tikillugit imartaq, tassanilu imartat timaaniittut avataaniittullu ilaallutik.

Inatsisissatut siunnersuut marlunnik pingaarnernik siunertaqarpoq. Siulleq tassaavoq imaani avatangiisinut inatsisip nunani tamalaani inatsisinut atuuttunut naapertuuttunngortinnissaa. Aappaa tassaavoq Kalaallit Nunaanni avatangiisinut tunngasunut annertunerusumik naleqqussakkanik, aammalu imaani avatangiisinut maleruagassiinnermut Kalaallit Nunaanni

kissaatigineqartut piumasaqaatigineqartullu aallaavigalugit, nutaanik maleruagassaqalersitsinissaq.

Pinngortitap avatangiisillu illersorneqarnissaat, taamaalillunilu inuiaqatigiinni ineriartornerup nungusaataannitsumik inuit inuunerannut atugassarititaasut ataqqillugit, aammalu uumassuillit ataqatigiinnerannut piujuartitsisussamik tunngaveqarluni ingerlasinnaanissaa Inatsisissatut siunnersuummi siunertarineqarpoq. Tamanna inatsisissatut siunnersuummi aalajangersakkat assigiinngitsut, mingutsitsinissap pinngitsoorneqavinnissaanik, mingutsitsisoqareernerani ajoqusiinerit killilersorneqarnissaanik, aammalu sananeqaatinik atortunillu ajoqusiinnaasunik imaanut immallu silaannartaanut aniatitsisarnerup annikillisinnissaanik suliniuteqartoqarnissaanik siunnerfeqartut aqutugalugit anguniarneqarpoq.

Inatsisissatut siunnersuummi nutaaliornertut taaneqarsinnaapput upalungaarsimaneq aamma mingutsitsinermik alapernaarsuineq pillugit maleruagassat sukannernerusut, imaatigut angallannerup killilersorneqarnissaa pillugu maleruagassat aammalu umiarsuarnut qimaannakkanut tunngatillugu akuliunnissamut nutaamik periarfissaqalernera. Nunani tamalaani maleruagassanit nutaanit, ilanngunneqartunit, taaneqarsinnaapput imeq oqimaaloqutaasooq aamma uumasut takornartat pillugit maleruagassat kiisalu imaanut eqqakkanik imaarsisarneq pillugu maleruagassat sukannernerusut. Tamatuma peqatigisaanik inatsisissatut siunnersuut inatsisaavoq sinaakkutissaq, tassa imaappoq mingutsitsinermik pitsaaliuinissaq pillugu peqqussutiniq assigiinngitsunik arlalinnik pilersitsinissamik periarfissiisooq.

Qallunaat avatangiisinut maleruagassaannik, 3 sømiilip avataanut avammullu Kalaallit Nunaata aningaasarsionikkut killeqarfiata tungaanut atuuttumik Danmarkimi avatangiisinut Ministeriqarfik nutarsaanernik assingusunik suliaqarpoq. Siunertaagaluarpoq inatsisit marluk taakkua ataatsikkut atuutilersinnaassasut. Kisiannili danskit inatsisissatut siunnersuutaannut piffissamut pilersaarut allanngortinneqarpoq, aammalu danskit maleruagassiai aatsaat ulloq 1. januar 2018 atuutilersinnaassasut naatsorsuutigineqarpoq. Tamanna apeqqutaatinnagu inatsisissatut siunnersuut manna aamma danskit inatsisissatut siunnersuutaat ataatsimut isigalugu Namminersorlutik Oqartussat aamma danskit oqartussaasuisa akornanni pitsaasumik oqaloqatigiinnikkut suliarineqarput, aammalu inatsisissatut siunnersuutit imminnut ataqatigiilluarnerat qulakkeerneqarluni.

3 sømiilip iluani annertuumik mingutsitsinermik akiuiniarnermi akisussaaffiup agguataarneqarnera pillugu isumaqatigiinngittoqarsimavoq. Qallunaat naalagaaffiata ukiuni kingulliunerusuni Kalaallit Nunaata eqqaani imaani annertuumik mingutsitsisoqartillugu akiuiniarnissamut aningaasartuutinillu tamatumunnga attuumassutilinnik akiliinissaminut pisussaaffini apeqqusertarsimavaa, Kalaallit Nunaat qallunaat naalagaaffianut tamatumunnga qinnuteqassappat naak 1989-imi erseqqissumik isumaqatigiissutaagaluartoq.

Naalakkersuisut sinnerlugit Illersornissamut Ministerimik Claus Hjort Frederiksen-imik Martsip 24-iani 2017 Nuummi naapeqateqarpunga. Ataatsimiinnerup inernerivaa mingutsitsinermik akiuiniarneq pillugu 1989-imi isumaqatigiissut naapertorlugu imaani Kalaallit Nunaata eqqaaniittuni najoqqutassiamik isumaqatigiissuteqarneq. Isumaqatigiissummik imaani avatangiisinik mingutsitsinermik akiuiniarneq pillugu suleqatigiinnissamik najoqqutassianik tunngaviusunik Kalaallit Nunaat Danmarkilu isumaqatigiissuteqarput.

Taamaalilluni erseqqilluinnartumik imaalerpoq, (issuaaneq aallartippoq): "Kalaallit Nunaata eqqaani imaani uuliamik akuugaassutsinillu annertuumik mingutsitsisoqartillugu, qallunaat naalagaaffiat mingutsitsinermik akiuiniqqullugu, qallunaallu naalagaaffiata qinnuteqaammik taamaattumik akuersissalluni mingutsitsinermillu akiuniarnermut aningaasartuutit akilissallugit pisussaaffeqartoq Kalaallit Nunaanni Namminersorlutik Oqartussanit qallunaat naalagaaffiat qinnuigineqarsinnaasoq. Annertuumik mingutsitsineq mingutsitsineruvoq, Kalaallit oqartussaasuisa namminneq upalungarsimasuutiminnik akiorsinnaanngisaat. Oqartussaasoq taanna, aningaasartuutinik akiliisimasoq, mingutsitsisumiit aningaasartuutit tamakku utertinniarsinnaavai." isumaqatigiissut tamanna Inatsisissatut siunnersuutip matuma aalajangeqqavaa.

Taamatut oqaaseqarlunga siunnersuutip Inatsisartuni kajumittumik suliarineqarnissaa inassutigaa.